



Terenga 4: Hōtaka 32 - He tūwāhi

He Mihi

Kei ngā uku, kei ngā whakauru o ngā hau e whā, nau mai anō ki roto i ngā ringa māhorahora o Ako, te toro atu nei ki a koutou.

Hei Mahi Whakarongo

Nō Te Taitokerau te kaikōrero o te rangi nei e kōrero ana mō tētehi huarahi whakatau raruraru i waenganui i tētehi tokorua nō reira. Anei ngā pātai hei whakautu mā koutou i a koutou e whakarongo ana ki te ia o te kōrero:

- 1) Nā wai a Uenuku rāua ko Kaharau?
- 2) Ko hea te wāhi ki a Uenuku i te mutunga iho?
- 3) I tau te manu aute ki hea?

Kia tahuri tātou ki te whakarongo ki te reo o Rereata Mākiha.

He Whakamārama

E whai ake nei ētehi kupu hei tō i te aronga o te tangata ki tētehi wāhi.

- Arā. (Titiro ki korā.)
- Anā. (Titiro ki konā.)
- Rē! (Kei korā.)
- Irā! (Titiro ki korā.)

He tūwāhi:

Ka whai katoa ēnei kupu i ngā pūwāhi 'i', 'ki', 'kei', 'nō' me 'hei'.

reira	korā	konā	konei	kō
rō	roto	tua	muri	mua
runga	raro	waenga	uta	tāwāhi
rāwāhi	rahaki	tai	tātahi	waho
roto	wīwī	wāwā	mahurangi	tuawhenua

Kia mataara:

- Ka whakamahia e te Māori te kupu 'runga' mehemea e kōrero ana mō ngā mea kei te waka.
Kei runga i te waka taku koti.
- Ko te kupu 'reira' te kupu tika mehemea kua kōrerotia kētia te wāhi.
P: Kei Rotorua tō matua.
M: Āe. Kei reira hoki taku tungāne

Hei Mahi

Whakamāoritia ngā rerenga e whai ake nei:

1. Take your shoes over there.
2. My family are overseas at the moment.

Whakapākehātia tēnei whakataukī:

3. Kei tai te kino, kei uta te whiunga.

Whakautu:

1. Haria ō hū ki kō/korā.
2. Kei tāwāhi taku whānau i tēnei wā.
3. A storm at sea has an effect ashore.